

四庫全書

史部

欽定四庫全書

蜀中廣記卷十七

明 曹學佺 撰

名勝記第十七

上川東道

重慶府

巴縣附郭

山海經曰西南有巴國大皞生咸鳥咸鳥生乘釐乘釐

生後照後照是始為巴人有國名曰流黃辛氏其域中
方三百里其出是塵土有巴遂山澠水出焉又有朱卷
之國有黑蛇青首食象郭璞註云今三巴是也後照乃
巴人始祖辛氏即鄴氏出是塵土言殷盛也食象即巴
蛇也 水經注曰江州縣故巴子都也按春秋桓公九
年巴子使韓服告楚請與鄧為好寔始見傳文公十六
年楚人秦人巴人伐庸寔始見經及後七國稱王巴亦
稱王華陽國志慎王五年蜀苴相攻苴侯奔巴巴為請

于秦秦使張儀救苴滅蜀儀貪巴苴之富遂滅巴執王
以歸乃城江州而置巴郡焉漢書列傳揚雄之先稱揚
侯處于巫山至漢興其族遡江上居巴之江州即此縣
矣 兩漢巴郡東至魚復北接漢中西連轆道南極黔
涪孝桓帝時刺史但望采文學掾趙芬等議上疏曰謹
按巴郡圖經境界南北四千東西五千周萬餘里屬縣
十四鹽鐵五官各有丞史遠縣去郡千二百至千五百
里鄉亭去縣或三四百或及千里刺史行部不到十縣

太守行桑農不到四縣且江州以東墊江以西上下殊俗情性不同敢欲分為二郡一治臨江一治安漢朝議未許獻帝初平元年劉璋始以墊江以上為巴郡治安漢以江州至臨江為永寧郡胸忍至魚復為固陵郡巴遂分矣建安六年魚復蹇脩白璋爭巴名乃改永寧為巴郡固陵為巴東以治安漢者為巴西於是有一三巴之號按今地理沿舊但墊江猶屬巴郡耳巴志曰漢世郡治巴水北有柑橘官今北府城是也後乃徙南城今

江北府城今江北南城今南城坪是 常道將志云劉
先主時都護李嚴大城江州週迴十六里欲鑿城後山
自汶江通水入巴江使城為州求以五郡置巴州丞相
亮不許亮北征召嚴漢中故穿山不逮然造蒼龍白虎
門別郡縣倉皆有城按治西十里佛圖關左右顧巴岷
二江是李正平欲鑿處斧跡猶存今府城為門十有七
九開八閉以象九宮八卦或曰象龜首乃向塗山 水
經曰江水又東北至巴郡江州縣東強水涪水漢水白

水宿渠水合南流注之註曰強水即羌水宿渠即潛水
渝水又云巴水出宣漢縣巴嶺山南流歷巴中徑巴郡
故城南李嚴所築大城北西南入江庾仲雍所謂江州
縣對二水口右則涪內水左則蜀外水是也巴水亦名
西漢水寰宇記云巴縣所理岷江之北漢水之南矣
李白峨嵋山月歌峨嵋山月半輪秋影入平羌江水流
夜發清溪向三峽思君不見下渝州司空曙發渝州却
寄韋判官詩紅燭津亭夜見君繁絃急管兩紛紛平明

分手空江轉惟有猿聲嘯水雲 府治枕金碧山漢時
分祀金馬碧雞處也宋淳祐中制置使余玠因舊址累
為臺曰金碧臺嘗草詩餘一闕隸友石二字刻在治後
式燕堂玠又嘗敕招賢館於府東偏下令曰有謀欲以
告近則徑詣公府遠則言於郡以禮遣之館中供帳一
如帥府焉 輿地碑目渝州有漢故益州刺史碑有延
熙中嚴孝子碑有漢靈帝時太守張訥頌德碑俱云在
郡治有劉宋義熙碑在岷江邊水淺涸始得見之見必

有秋又名豐年碑 本志云郡學後蓮花壩有石麟石
虎相傳為古時巴君冢又云治北康村有小阜二十餘
俗呼古陵亦曰巴子冢矣縣學有夫子燕居像有元文
宗書萬里歸程四字故猶稱御書樓 梁書曰巴郡有

地忽自開成井方六丈深三十二丈圖經唐刺史皇甫
珣於巴縣南鑿石六丈得泉號為新井以別於舊井也
志云城內崇因寺有淨香亭修竹檀欒與金碧臺相
掩映又云治平寺有石刻西山佛三字旁刻開山祖月

名祖月宋治平時僧也有羅漢先天二洞皆古洞又云
城中有東華觀觀後有東華十八洞皆相通今土人呼
其處為神仙口相傳東華真君于此得道又云五福宮
乃城中最高處俯窺闔閭坐帶江流矣 寰宇記云塗
山在縣東南八里岷江之南岼高七里周廻二十里尾
接石洞峽先主置關於此峽東西約長二里許華陽國
志曰禹娶於塗山今江州塗山帝禹之廟銘存焉又曰
山有禹王祠及塗后祠陶宏景水仙賦云塗山石帳天

后翠幙夏禹所以集羣臣也按倦游錄三門禹廟神儀侍衛極肅後殿一壇裴像侍衛皆胡人云是禹婦翁今不存 三巴記云塗山北水有銘書辭云漢初捷為張君為太守忽得仙道從此升度又云縣下有清水穴巴人以此水為粉則膏暉鮮芳貢粉京師因名粉水故世謂江州墮林粉也今山下有清水溪即其處舊有道院名清溪院清水穴左為龍門峭壁中分瀑布下垂春遊汎艇必曲折經此渡江而歸穴之右為海棠溪溪植花

木當夏漲時拏舟深入可數里而得幽勝矣水經注云
江水又東逕黃葛峽山高嶮全無人居圖經云塗山之
足有古黃葛樹其下有黃葛渡制置余玠詩云龍門東
去水和天待渡行人暫息肩自是晚來歸興急江頭爭
上下夕陽船此黃葛晚渡作也白樂天塗山寺獨遊詩
云野徑行無伴僧房宿有期塗山來去熟惟是馬蹄知
宋余玠詩木魚敲罷起鐘聲透出叢林萬戶驚一百八
聲方始盡六街三市有人行則今之覺林寺矣志云

城西雉堞下有洞曰洪崖覆以巨石其下嵌空飛瀑時至亦名滴水崖有元豐時蘇軾任仲儀黃庭堅題刻嘉泰中成繪于中起吏隱亭洪偁又起輕紅亭焉 茅盈內傳曰秦始皇三十一年九月庚子茅盈高祖濛乘雲駕鶴白日昇天先是有巴謠曰神仙得者茅初成駕鶴上昇入太清時下玄洲戲赤城繼世而往在我盈帝若學之臘嘉平始皇聞之于是改臘為嘉平也今治西有棲真洞在大茅峽相傳洞中曾息大茅君云 李膺益

州記廣陽州東七里水南有遮要之埵石志云治東江
許廣陽壩即廣陽州也字安從洲北石江中突起俗名
遮夫埵 華陽國志郤東枳有廣德嶼有明月峽故巴
亦有三峡也王維曉行巴峽詩云際曉投巴峽餘春憶
帝京晴江一女浣朝日衆禽鳴水國舟中市山橋樹杪
行登高萬井出眺迴二流明人作殊方語鶯為舊國聲
賴多山水趣稍解別離情杜甫渝州候嚴六侍御不到
先下峽詩聞道乘驄發沙邊待至今不知雲雨散虛費

短長吟山帶烏蠻閣江連白帝深船經一柱觀留眼共
登臨益州記云遮塹石東二里至明月峽峽前南岸
壁高四十丈有圓孔如滿月狀本志明月沱邊有高冢
橫刻伯喈墓三大字按蔡邕曾遷巴郡太守不拜有謝
版云巴土長遠江山修隔宣暢聖化道遵和風非臣才
力所能供給其墓未詳矣過此有紫金山有寺名金紫
寺又過此有古灘城為巴子置津處又二十里有銅鑼
峽以水響聲似之是涪岷水會處峽有關馮當可葬其

上有圓石高懸 志云治西十里石壁繪佛像一徑僅容輿馬即佛圖關也又三十里為多功城宋末築有寺名多功寺門垣尤存寺有天池水又四十里為長安洞秉燭深入可里許見雙石墩猶龍過此則皆渟泓積水矣相傳崇因寺前居民屋內有洞與此通故崇因寺亦謂之長安寺也又二十里為東陽鎮唐置東陽城焉輿地碑目蜀廣政十五碑在東陽鎮市心即此陳子昂入東陽峽與李明府舟前後不相及詩云東崖初解纜南

浦遂離羣出沒同洲島沿洄異渚濱風煙猶可望歌笑
浩難聞路轉青山合峰迴白日曛奔濤上漫漫積浪下
沄沄倏忽猶疑及差池復兩分離離間遠樹藹藹沒遙
氛孤狔啼寒月哀鴻叫斷雲仙舟不可見遙思坐氤氲
又合州津口別弟至東陽峽步趨不及詩江潭共為客
洲浦獨迷津思積芳亭樹心斷白眉人同衾成楚越別
島類胡秦林岬隨天轉雲峯逐望新遙遙終不見默默
坐含嚔念別疑三月經遊未一旬孤舟多逸興誰共爾

為隣峽之隔岸亦名龍門有石刻是江津縣龍門灘矣
圖經縉雲山在縣西北百三十里其山高聳多林木
下有溫泉分東西流相傳黃帝於此合藥陶宏景水仙
賦曰增城瑤館縉雲瓊闕黃帝所以觴百神也方輿勝
覽即謂之巴山矣宋靈成侯廟碑云此山出于禹別九
州之前黃帝時有縉雲氏不才子曰混沌縉雲氏高辛
氏亦有不才子八人投出于巴實以禦魑魅名基於此
山有九峰寶塔峰最著亦阿育王塔八萬四千之一也

迦葉尊者于九峰頂上示一十三足又飭袈裟印文於
獅子峰 按感通錄縉雲寺即古相思寺也以此山有
相思崖生相思竹形如桃釵矣吳均春秋渝州西百里
相思寺北石山有佛跡十三皆長三尺許闊一尺一寸
深九寸中有魚文在佛堂北十餘步貞觀二十年十月
寺側泉內忽出紅蓮花面廣三尺遊旅往還無不嘆訝
經月不減高僧傳隋無相禪師渡笠唐慈應禪師受記
二龍處矣 縉雲傳勝錄云宋初慧懽禪師住持太宗

皇帝御誦梵經二百四十函真宗咸平元年迎至寺景
德中勅改崇教寺封慧懽為慈印大師有慈印師遺誠
碑咸平三年二月二十七日立凡十三則有熙寧三年
提點夔州路諸州刑獄江中行立石界約秘書有權渝
州事都官宋構藏經記按宋史仁宗天聖元年三月庚
辰涪陵相思寺夜有光出阿育王塔舊址發之得金銅
像三百二十有七則此山在宋時稱極盛矣 山麓溫
泉懸崖湧出四時騰沸中有遊魚數十尾人皆見之宋

推官彭應求詩云公程無暇日乍得宿清幽故覺空門
客不生浮世愁溫泉喧古洞寒磬度危樓徹曉都忘寐
渾疑在沃州周茂叔艤舟其下刻之于石方輿勝覽載
縉雲先生馮時行詩云借問禪林景若何半天樓殿冠
嵯峨莫言暑氣此中少自是清風高處多岌岌九峰晴
有霧瀾瀾一水遠無波我來遊覽便歸去不必吟成證
道歌 圖經云西南百里涪江中有魚石鹿石俗呼魚
鹿峽以形肖也 杜光庭錄異記曰江州縣南五十里

沱江山下有七里店其處夜常有光十餘枚如流星環石或聚或散石亦有光乃珠胎於此或人見而密識其處遲明尋之便不得 志云治南六十里冠山多古寺有仙侶洞洞中石牀石傘儼如刻畫又十里為大華山有荔枝禪院按華陽國志江州縣多荔枝園熟時二十石常設廚膳命士大夫共會樹下食之今樹已烏有而院名無恙也

江津縣

南齊時為江州縣理震宇記所稱夔溪口矣今呼南溪
溪源在縣東南合岷江遶治如几亦名几水 四夷縣
道記云自江津路南尋夔溪水路往南平州即此 周
地圖記七門郡置在夔口今之七門灘也志云在縣西
七十里 有七石橫江中 志又云治西有石門號龍門
灘即龍門峽也按陳子昂龍門峽詩曰龍門非禹鑿詭
怪乃天功西南出巴峽不與衆山同長竇亘五里宛轉
若嵌空伏湍煦潛石瀑水生輪風流動無晝夜噴薄龍

門中潭河勢不測藻葩垂彩虹我行當季月煙景共春
融江關勤亦甚獻寧意難窮誓將息機事煉藥此山中
志又云縣西十里有古石羊驛其地亦名石門對江
壁上鐫大佛有大佛寺故相張無盡所剏亦名無盡菴
傍有亭翼然據大石而藏茂林修竹中客登之徘徊四
顧南有鼎山東有天池北有馬驍其高各刺天中突一
峯名箕星尤奇特邑聚橫前萬瓦鱗列大江從西來委
蛇曲折濯流杯池漱挑燈石直注亭下鷗鷺往來在湮

波香靄間清絕不可名狀 宋知縣事冉木震碑云廳
事後有合抱荔枝唐人所種每熟時令肅士大夫會食
樹下猶有漢之遺風荔枝舊有亭亭中碑刻歲久剥落
想涪亭即舊址也昔黃魯直過江津與馮壽李仔善其
樂間堂記為馮作也魯直與王觀復書云梓州李仔任
道流寓江津二十餘年言行有物叅道得要老成人也
山谷晚號涪翁亭名想涪寄遐思耳 圖經縣北有巴
子養魚池神龍是潛志云在岷江南十里有長池廣袤

五丈四時湛然范景仁墓居其北按流寓傳范蜀公居
縣之長池里又云居樓臺山山在治西有范鎮村碑
目云剛直御史之墓虞允文為杜莘老書按碑在縣之
杜村有紹興乙亥右朝奉郎守司農少卿杜莘老題次
乾道丙戌杜宗甫磨厓宗甫即莘老拾遺之後也自青
神僑居于此又蘇伯瑜者叔黨之後亦自眉山僑居縣
之聖鍾里東坡書歐陽醉翁亭記真跡尚藏其家李
膺益州記云江州縣西南有仙池昔有仙人於此池側

置樓而居多植香草於樓下一夕忽縱火焚其草天降
紫雲飄然而去後人指其地為香草樓志云在今治西
南三十里 志又云唐大聖寺在縣西七十里按太平
廣記東蜀大聖院一木像製度瓌異耆老云像自荆湖
泝流而上歷歸峽等郡所過多具舟楫取千夫牽挽不
抵岸流至渝州州人焚香祈請應聲而往建此院安置
焉 異物志云在昔天旱水泉皆涸有姑氏病渴思得
甘泉其婦傍徨至周陽山下遇一叟曰能與吾釵則泉

可得婦拔釵授之墜于地而泉出至今磧中餘淺水一泓周五六尺有金釵影一雙按在縣西之周溪上婦亦周姓 又云昔有飛鳥嚙僧衣袖僧異之隨至石隙中窺見一金注子手不能及鳥復啣一枝與僧因得取注顧視啣枝乃苦栳木也其處在治北五里 碑目縣南三里挑燈磧石壁上鐫云乾道辛卯正月十九日天水趙宜之陪王屋李希仲太原王直夫同寺首珍況來遊飲不至醉王屋李孝友書按此即蓮花石也在江中不

恒見見則歲豐 已中記曰江州縣有峰窮峽按在今
縣東七十里珞璜鎮渝志云五十里有西山石壁上刻
終古磯新月半邊無夕陽之句志又云近時盜發王居
士墓墓中鐫二詩云官無名字私無債架有衣裳廩有
儲只此便同天上樂不知天上又何如芳草烟村宿雨
收牧童歸去倒騎牛笛中一曲昇平樂弄得生來未解
愁此墓在縣南一里居士亦不知為誰

壁山縣

宋李濬壁山普澤廟記云國朝蜀分為四而方各有鎮
由劍之裏為七曲劍以東為白崖劍以西為玉壘自蜀
而下為渝則有壁山是四山者如蜀之鎮一道生靈之
司命也 寰宇記云四面高山中央平田周迴二百餘
里唐天寶中諸州逃戶多投此營種川中有一孤山西
北二面險峻東南削平土人號為重壁山五代史後梁
乾化三年五月壁山騶虞見二鹿隨之歐陽永叔嘆以
為異也

永川縣

縣有蓮池壩二巨石崇聳欲合平行可半里許石竅中出水匯而為小池世傳蓮子從石竅中而出生蓮不由栽植又有石松坪在來蘇鎮有松化石石質而松理或二三尺許大可合抱然不過相望數山有之俗呼雷燒松杜詩所謂萬年松化石者即此 志云鐵山鎮在治東三十里趙抃過鐵山舖寄交代吳龍圖詩暫留山驛又晨興西望旌麾想舊朋三院筆簪曾對直兩川兵印

復交承年光頭鬢華如雪世態心情冷似冰境上憑詩
馳遠意青泥寒曉入雲登又云六十里有牛尾驛鄭國
華留題云龍尾道中退朝客雕鞍寶馬黃金勒誰憐遠
使足馳驅夜半孤村牛尾驛

榮昌縣

譚用之榮昌記云巴叢之饒谿交水橫列岫羅巘仄徙
不斷詩紀云河梁望壘頭分手路悠悠徂年驚若電別
日欲成秋黃鵠飛飛遠青山去去愁不言雲雨散更似

東西流此梁江總別袁昌州作也勝覽云唐段建中太尉文昌之父嘗典榮昌二郡事見李德裕成都資福寺記唐守之可考者惟建中楊琯李師望韋君集四人而已唐史載大厯中韋君靖為榮昌令值黃巢兵起君靖引兵從征動以信義所向克捷累官尚書僕射矣碑目云演教院碑在昌州舊基院有斷碑載唐咸通歲縣令唐允中又云六十四卦象碑在昌元縣又云淨土院碑在昌元縣東四十里唐太和五年建又云昌州北二

十里亂石灘有唐人碑刻曰龍灘其溪深遠千餘丈世傳古有龍行石裂成溪因名大抵昌州今之舊州堤是昌元里即唐昌元縣地也今榮昌乃古寶蓋鎮志云南一里曰寶蓋山有卧佛寺壘形如皂蓋圓淨明朗聳翠炫奇矣楊子謨顯惠廟記靜南山水奇秀士大夫避地者多居焉仙靈逸迹尚有董葛之遺風按志云縣東二十里曰葛仙山相傳漢葛孝先受左慈術於此修煉又有峰腦山山巔有白石如羣羊狀下有石洞亦葛

仙修煉處崖畔有巨石突出石縫中生桃一株高丈餘
葉幹與凡桃異花實不常國朝宣德中桃實各圍尺許
紀勝云縣南二十里老鴉山有李戡李幾兄弟故宅
二李善碁會遼索碁戰詔求天下善奕者蜀帥以戡應
詔遼望風知畏不敢措手文潞公贈以詩云昌元建邑
幾經春百里封疆秀色新鴨子池邊登第客老鴉山下
着棋人

大足縣

唐光啓以前昌元是昌州光啓以後則昌州理大足矣
縣左有碑字畫模糊大略是昌州郡孔目題名也碑目
云六經圖碑在郡學郡人楊甲鼎卿所著又云漢王方
平古碑顏魯公書在舊學今徙為別刻字尚在碑陰矣
冷齋夜話載有人調官都下踰年始得昌守已而求
易便郡有淵才者聞而往見之曰昌佳郡也官欲易地
有之乎曰然淵曰誤矣曰奉給優乎淵曰否訟簡乎淵
曰否然則奚誤曰海棠患無香獨靜南者有香非佳郡

而何故昌號海棠香國土人云地宜此花易植易蕃郡
治香霏室一老樹重趺疊萼每花或二十餘瓣花氣穠
郁餘不能及也 志云縣之東禪寺有宋徽宗手碑西
禪寺晉永建寶頂寺唐柳本曾學吳道子筆意環崖
數里鑿浮屠像奇譎幽怪古今所未有也 志又云老
君洞在治東南三十五里玉口山巔洞弘敞可容十餘
人內石牀石臼丹竈尚存洞巔一隙透明有泉自石罅
中流出山麓惟一小徑可通相傳老子煉丹于此 又

云寶珠溪在治南四十里唐貞觀時漁人郭福者夜捕魚見水際有光即之有蚌如斗剖得珠徑寸獻之太宗賜以積善并碑碣存又云北巖在治北三里唐韋君靖建砦其上曰永昌有石刻沿巖皆浮圖像輿地碑目云吳季子墓碑在北山相傳以為孔子書開元中殷仲容奉詔摸搨大厯中蕭定移刻潤州有張從申題其後又云高祖大風歌碑在北山又云古文孝經在北山凡二十二章與今文十八章小異王象之曰今文先出於

漢初而古文與尚書同出於孔子壞宅今文已盛而古文獨不列之學宮惟孔安國馬融為之傳及明皇注今文十八章孝經古文益微矣司馬光范祖禹皆曾繳進光謂始藏之時去古未遠其書最真祖禹又為之說亦云古文廣得其正 碑目又云唐韋君靖碑在北山乾寧二年靜南令胡密所作按胡密永昌寨碑云永昌寨者君靖韋公所建也頃乾符之際天下騷然旱蝗相仍兵戈四起公覩茲遐僻民不聊生遂合置義兵安戶口

抑強扶弱務織勸農足食足兵以殺去殺自黃巢侵陷
京關鑾輿出幸成都四海波騰三川鼎沸韓秀昇勃亂
黔峽侵軼巴渝公廼統率義軍討除逆黨值秀昇盡挽
舟檝圍逼郡城公廼詳度機宜上下攔截依山排陣背
水布兵兩面夾攻從中剪撲賊勢大敗我武維揚渝牧
田公備錄聞奏廼進忠節檢校御史大夫除拜普州刺
史值川師效逆帥臣專征公又收復合州絕其枝蔓加
右散騎常侍拜合州刺史洎鄭雄僕射失律廣漢山行

章尚書攻圍當州故太尉顧公屢降命旨頻招延應公
統領精銳二萬餘人虔告蒼龜申令士卒並破二十七
砦殺戮五萬餘人上聞偉績特加檢校工部尚書拜當
州刺史充昌普渝合四州都指揮使加刑部尚書右僕
射公以臨郡歲久廼思退居上表陳情宸衷未允特旨
量留加金紫光祿大夫檢校左僕射扶風縣開國男食
邑三百戶屢御鳳詔褒剖魚符政懋潁川化隆河內邑
有箱倉之咏俗多襦袴之謠求瘼之念彌堅去害之心

益切其於駕馭英傑取舍毫釐重仁義如丘山輕金帛
如泥滓憐孤恤老濟弱扶危行旅於歸遠邁鄭莊之驛
遊人若市悉登漢相之門其拯綏四方乃如此也每遇
良辰美景月夕花朝張管絃以追歡啟華筵而召侶周
旋有禮揖遜無譁罇俎不空座客常滿王行之冰壺轉
瑩嵇康之玉岫寧頽其禮讓謙恭有如此也至若立功
立事為國為民或身提黑槊或坐運玄機身先士卒首
挫兇徒謀必十全舉無遺筭其剛毅果敢又如此也當

夫賞功訢罪激濁揚清甄獎功勤黜棄私黨三異感德
萬衆歸心其恩威刑賞有如此也公以海濤未息雲陣
猶橫常願驅脅安置左綿載實倉庾奔衝遂府使牒呼
逼邊檄征行然士馬雖精如柵砦未固何思大易習次
之義徵王公設險之辭迺於景福元年歲春月卜築當
鎮西北維沿岡山建寨茲山也上摩掩靄下抗平原矗
似長雲萃如斷岍岬獻重疊磴道崎嶇一夫荷戈萬人
失據由是芟薙草萊相度地形人力子來畚鍤雲至連

甍比屋萬戶千門高亢濬流烟籠粉堞霧捧朱樓龍吟
笳角之聲雷動鼓鼙之響而又良工削墨心匠設規築
城堡二十餘間建敵樓二十餘所遥瞻天際非龜城之
可倫高倚雲間豈蜃樓之能擬其上則飛泉迸出綠水
滂流崢嶸一十二峰周廻二十八里蓋造化之凝結豈
金湯之比倫況糧儲千年兵屯萬數遐邇徵休軍民胥
慶耕織無妨徭役不缺可謂一勞永逸有備無患者矣
其軍中節級將校等賢深達機略博識古今有如同志

兄弟異姓骨肉一心報國戮力從軍咸奉渥恩皆沾爵
賞或崇帶劍或位專城或榮授金貂或職兼霜憲雅荷
際會允屬休明請列署石街庶不墜勲業云爾乾寧二
年乙卯十二月朔日癸未十九日辛丑記

蜀中廣記卷十七

欽定四庫全書

蜀中廣記卷十八

明 曹學佺 撰

名勝記第十八

上川東道

重慶府二

合州

三國志先主詣劉璋取道墊江入涪常道將曰巴子時



雖都江州或治墊江又曰墊江在巴郡西北中水四百里
有桑蠶牛馬漢時淳于長寧雅有美貌即此地矣

圖經云魏之合州石鏡縣隋之涪州涪陵郡唐之合州
巴川郡宋之合州石照縣皆理此方輿勝覽州南百步
內江水心有石屹立正圓如月其根嶄嵒如雲捧之謂
之石鏡冬出水可三丈碑目云涪內水石鏡題名云大
歷三年此石出兵甲息黎庶歸六氣調五穀熟刺史兼
侍御史王鉉記按石鏡石照縣俱以此名 魏華父瑞

應山記云景德間合州瑞應山出異木文理成天下太平字志云瑞應山在州後濮子墓在其上光教寺在其下寺今為州理所方輿云張柬之守合州姚崇薦其沉厚具相才故州治有沉厚堂今名景厚本此堂中篆繫辭八字字徑四尺李陽冰書碑陰為孟景石經周禮數段碑目云李當塗篆龍門鳳穴司馬君實書公生明蘇唐卿篆蒙泉竹鶴等字俱嘉定間李元庚刻在治北鄉林岩上治西鶴鳴里有招鶴亭三字宋徽宗書按

志宣和間許生舉進士愛其隣人朱受家羣鶴起亭作
詩招之鶴果來集朱憤而慙諸朝上命均之鶴以離羣
悲鳴不已道君為書亭額賜焉 州有永清里里有
夜雨寺僧智果所居取李義山巴山夜雨之句也又有
墊江里里有龍骨寺為龍蛻處巴中記云墊江多龍
矣志云周元公判州事嘗與客奕一老人來觀口流涎
而香公驚問曰汝龍也何以至此老人曰安知之公曰
以涎知爾忽大雷電起老人化龍泝溪而上公乃令琢

方石二十四片以鎮之今通曉橋是其處在城內之明月街 晁公武清華樓記曰合州其山龍多銅梁上接岷峨下繞甌越屬海而止所謂南戒者也水則涪水嘉陵合流城下貫江沱通漢沔引衆流入于海所謂南紀也 水經注云宕渠水亦名潛水又名渝水俗謂之渠江竄宇記云渠江水在縣北十五里源自萬頃池分來經巴達渠廣安等界至本州東北與嘉陵江合即西漢水勝覽云西漢水在石照縣東百步戰國策所謂漢中

之甲輕舟出於巴乘夏水下漢四日而至五渚也其源
發西和州徼外徑階沔又逕大安軍利劍閭果與涪水
會 蔡松年南北史補云吐谷渾主登其國西疆觀墊
江源問水所經長史曾和對曰此水經仇池過晉壽出
宕渠始號墊江至巴郡而入于江度廣陵會于海主嘆
曰水尚知歸吾獨無所歸乎乃遣使南通于劉宋 志
云會江門樓即唐之會江樓也杜詩君今起柁春江流
余亦沙邊具小舟幸為達書賢府尹江花未盡會江樓

范成大詩井陘東出縣山河古合州木根拏斷岍急雨
洗江流闕下嘉陵水沙頭杜老舟江花應好在無計會
江樓文苑穆員送合州徐使君序云二月中節時芳為
人柳先攀折而垂水待臨泛而滿花迎酒客而笑鶯隨
詩人而吟亦會于江樓矣方輿勝覽云直郡治之會
江樓有學士山其高不能踰傍山而南峰斜崖諸勢班
班若出其下亦甚異也山麓有張氏荔枝異本合榦唐
文若曲端嘗賦之勝覽又云石照東北七里東臺山

欽定四庫全書

漢中府志
卷十八

四

漢末薛融讀書處東十里東山趙子伯章別業有東山
二字廣文餘西二十里牟山唐康元良讀書處 舊經
云合州北崖在州北五里或以古濮國附會為濮岩非
也岩有古栢數十章率圍八九尺有定林院歲正月九
日郡以故事設宴於此遊人盛集又有荔枝閣沿崖鐫
象設古意生動及古賢題刻甚多又有濮湖在岩下雖
傾圯古隄及岩上刻字猶存岑象求定林院詩野闊蓮
宮迥樓臺半倚山地連巴峽近門對濮溪灣栢徑松煙

濕岩房雨蘚斑白雲邀客住明月伴僧閒經梵喧譁外
香燈杳靄間勝遊成邂逅危構喜躋攀世路長何極塵
心久欲還輜車正催發緩步出重關元祐五年太守劉
象功作濮品銘其序云距城三里有僧舍依大江林麓
樓觀聳出如畫者伏於纁素間其絕俗幽邃厯厯可指
予幼時侍先君嘗遊今被命領郡復至其所憮然有感
親懷舊之嘆因作銘書諸品石云合之二川河漢發源
極地通天浩渺東傾奔龍竄鯨吞夔走荆上有蒼品喬

欽定四庫全書

蜀中廣記
卷十八

松古杉陰晴撲藍飛嵒斷壁烟昏霧塞冥空嶽坼巴濮
鄰國氣象相賊為狼為貆劒血初蝕二王滅迹雲間晝
寂世變茫茫山空地荒鳥剽獸藏創業其時鑿高構危
立剝開基在昔幼冲侍於先公曾步嵒宮帝命惟汝克
蹈前武得治茲土馳馬歲久江山惟舊中懷孔疚勒銘
其巔子承孫傳與山齊年興地碑目石照北嵒廬舍
那佛題名云敬造廬舍那佛一軀菩薩二軀唐長慶三
年歲次癸卯三月十九日銀青光祿大夫使持節合州

諸軍事行合州刺史兼御史中丞劉溫溫自幽燕而來
從左羽林軍使改授此記之歸正寺岩 又云石門彌
陀像開元二十三年州別駕張釗為刺史孫希莊作
又云關詠永言王愜微之李儀表臣皇祐壬辰寒食日
來 又云崇寧丙戌歲時雨露足因觀民田率巡檢高
公綜仲實石照令王叔陵仲陞法曹馬師古宗道主簿
姜宇定中同行至此早饒重午後一日郡守李樂道題
又云馮茂恭邵商民唐立夫紹興乙亥十月癸巳同

遊 又云宇文休丹德濟閭文叔呂達夫乾道己丑三月廿四日來遊 又云濮巖東州勝處乾道辛卯立秋杜國光偕趙彥和馮廷式及其弟慶遠酌歲寒亭 方輿勝覽云釣魚山在石照縣東十里涪內水在其南西溪上流經其北郡人遊者以舟下涪水艤而上已乃繞山北沿西漢水而歸此遊觀之奇也山南大石砥平有巨人迹相傳異人坐其上投釣江中山以是名下有大刹曰護國寺歲二月八日太守率僚屬宴集于此志云

釣魚山東西南三面據江峭壁懸厓安撫使余玠於山
建城以禦胡元故又呼釣魚城也上有天池周五百餘
步後有石菴凡二十四片石鑿成開山石頭和尚所剏
西南隅有祠奉李忠宣公德輝盖安撫王立之義妹李
氏在園中忠宣奏關得保全其人民云元人登釣魚山
詩臺倚層巒萬仞高魚龍面面湧驚濤振衣更切臨淵
想擬選長竿學釣鰲又峰頭借得月為鈎把向江心自
不收莫笑山人似緣木礪溪元是釣西周又遺庵故傍

唐僧塔荒壘猶餘宋戰場讀罷題詩聊騁望半江寒霧
送斜陽 輿地碑目眉山王魯望萬里西歸艤舟合陽
趙濱甫侯德之定之孫相之載之相與遊釣魚秋雨初
霽心意豁然酌酒至明興盡而返 又云眉山家漁歸
以嘉定乙亥七月九日訪釣魚小供因留詩石上暫脫
塵羈入古藍西風送我與禪參漲開二水虬朱鬣嵐隱
諸峰玉碧簪兩武深痕墮塵跡一推打就蹋雲庵自憐
把釣人多老消息遥遥自渭南 又云紹熙改元郡守

汲國呂交修無棄以清明日率長安母如愚子發長江
杜几伯扶資中馬三捷周臣普慈楊文彥章蓬溪趙君
瑞族人郁某既放舟來尋釣魚城之勝積雨初霽放懷
舉酒男鑒仁姪近仁明仁與仁偕麟孫住僧侍行其傍
有閩人朱渙詩云釣魚磯上着閒身胸次應無一點塵
偶爾不逢周漢主此心端弗愧前人紹熙辛亥臘月既
望又云東沂尉行之輔之約晉國趙資深才父遂寧
陳子龍益昌王國秉錦官王正仲乙卯慶元仲冬來遊

又云眉山李壁來遊甥劉沖之族子潮俱慶元三年
狗日 又云新南劍州使君三衢徐公以今春解南昌
之組治舟合陽避夏秋水漲以良月甲子解纜西歸攝
郡僉李忠父偕同僚史仲立趙季紳梅君用張子信何
文振張通叔白德章劉光父晁季子餞別於此 郡國
志云巴城在漢南江是楚襄王滅巴封其子為銅梁侯
故有此城方輿勝覽云石照南五里有巴子城乃周武
王封其支庶處在涪江南銅梁山下縉雲馮時行序謂

山有茶色白甘腴俗謂之水茶甲於巴蜀元和志謂其
多玉蕊花桃竹杖也 寰宇記云銅梁山在石鏡縣南
九里東西連亘二十餘里山巔平整環合諸峯此其獨
秀者圖經有宿雲崖方崖松風閣讀書堂博古齋諸勝
趙伯宜之別業也 志云山在州南五里石梁橫亘其
色如銅崖鐫銅梁山三字有石洞梁深丈餘有石牀可
坐十餘人唐閻丘道人居此五十餘年迺化去棋局丹
井猶存題名于洞壁者有閬州城南果何在永州澹嵒

天下稀使山谷見之當復作何等語紹興癸酉春九日
韓國趙善敏濩澤王季蒙普慈馮憲來 又梁叔解組

舟過合陽奉同登銅梁地主趙周祐鄉人王彥澤梁公
行家姪方叔俱來紹興二十九年四月癸巳景和仲書

又魯國趙彥博富文從元憲兄造銅梁山觀洞天石
室丹臺靈泉茂林修竹之富仙境宛然追思周祐兄清
標高致今已隔世恨不當日得陪杖履周祐乃元憲仲
弟其子師美敦書樂善予子信常與之同僚知有子矣

是晚元憲具酒肴於洞靈之道院道京師陝西事談論
竝偉衮衮可聽吾宗之英也元憲之子師儒師老侍皆
孝友恭儉克其家者日既夕乃歸淳祐二年五月十三
日題 蜀都賦云外負銅梁劉孝威詩銅梁不可攀孔
德紹詩銅梁忽背飛王維送李員外賢郎詩少年何處
去負米上銅梁借問阿戎父知為童子郎魚牋請詩賦
撞布作衣裳薏苡扶衰病歸來幸可將晁公武將發合
州詩銅梁山昏空翠重石鏡水落灘聲遲皆此山也

寰宇記云隋折石鏡置赤水縣以赤水出其源也按志
州西百餘里有赤水鄉赤水縣址存王象之碑目云唐
令長新戒在赤水縣開元二十四年立玄宗嘗擇縣令
百六十三人賜以丁寧之戒其後為縣者皆以戒刻石
集古錄取焉景祐中令重刻之今非唐故物矣又云雁
塔題名在赤水縣解宣和間柳瑋始刻置長安慈恩寺
此蓋榻本也又云赤水縣龍多山唐人刻字此山高
明窈深變態萬狀下視涪水如帶烟雲出沒山之偉觀也

又云祭龍多題名天寶十四載十月十一日大中大夫
守巴川郡太守真寧縣開國男上柱國賜紫金魚袋韋
藏鋒準制醮祭又云唐孫樵龍多山錄舊刻刊闕元祐
七年劉象功再書適勁可喜又云集聖院記在赤水縣
之龍多山唐咸通間李稽作又云龍多山鷺臺院紹興
三十二年十一月縉雲馮時行記略云龍多山有至道
觀觀東大池為則天后放生池中峰有鷺臺佛慧二院
院栽萬竹竹徑圍尺有仙栢圍丈有二尺中空而柯葉

敷腴有靈山院泉自崖出潄為方池大旱不竭有駕鶴
軒下視涪水如帶處 圖經云晉永嘉三年馮仙舉家
十七人於龍多山昇去按即馮益羅也今仙臺觀其燒
丹處至道觀壁間其繪像存焉馮時行詩云兒童便讀
山中記老大才登記裏山何麟詩世路聲牙赤水過故
升天險問龍多彭應求詩一望東川盡數州依崖泉石
更清幽不辭挹月披雲卧攬取山房一夕秋註云山遠
且高逶迤如龍蟠故曰龍多也涪江在其下去州百二

十里 寰宇記青石山在石鏡西二百二十里涪水之
南漢時山裂之處至今猶存李膺益州記曰昔巴蜀爭
界久而不決漢高八年一朝密霧青石山為之裂自上
及下破處直若引繩焉於是州界始判上有古祠靈於水
旱華陽國志所謂青石神矣 予觀孫樵龍多山記云
梓潼南鄙越五百里其中有山崛起中天即山之趾得
徑委延舉武三十北出其巔氣象鮮妍孕成陰烟屹石
巉巉別為東巖槎牙重複爭先角逐若絕若裂若缺若

穴突者虎怒企者猿踞橫者木朴挺者碑豎又有似乎
飛簷連軒栴櫨交攢欹撐兀柱懸棟危礎殊狀詭類愕
不得視下有畝平砥若戶庭攄乳側脉膏渟泓石俯對
絕壑杪臨蘭薄仙臺標異藪石負起屹與山別猿鳥蹟
絕腹竇而空路由其中斷鵲相望攀緣上下闐然而出
曜見白日始時永嘉飛真蓋羅玄踪斯存石刻傳聞丹
成而仙駕竊騰天一去遼廓千載寂寞澄泉傳靈別壑
絕明風閒境清寂寞無聲佳木美竹岡巒交植風來怒

黑雷動岩谷山禽品獸捷翮互驚曉吟暄啼聽之淒淒
迴環下矚萬類在目因山帶川青縈碧聯莽蒼際天杳
杳不分月上于東日薄于泉魄朗輪昏出入目前其或
宿霧朝雲糊空縛山漠漠漫漫莫知其端暘曜始浴徹
天昏紅輪高而赤洪流激射濃透薄釋綿裂綺折千狀
萬態倏然收霽樵起來而遊泊車而休登降信宿聞見
習熟始曰山乎曾未始有得乎無處夸世釣名者汚此
巖扃乎且欲聞于潁陽之徒乎

銅梁縣

川曰巴川以水遶其治前如巴字矣山曰巴嶽以峰高出雲表如嶽勢矣碑目云古書巖在巴川縣石間隱隱如篆文不可讀又云季札墓銘在巴川縣相傳以為孔子所書紀勝云縣東里許丘曰羅堆名東崑宋馮倓記云歲星位于泰熒惑位于衡太白位于華辰星位于常鎮星位于嵩而羅堆計都二星位于巴嶽之旁昭然可考也勝覽云南峰在巴川縣東四十里高五里

是為峽山之首兩山複出對峙中廣十里塗左有穴謂
之仙洞其深五里竇水流為澗有嘉魚又云中峰在
巴川縣東南六十里山環二十里如盤民錯居如畫有
泉自山注下曰天池 紀勝云縣南十五里有巴嶽山
絕頂蟠螭若爐其下有崑崙洞多蒼玉產仙茅管唐長
慶中采樵者服之得仙又產木蓮花高五六尺葉如梗
楠花如菡萏出山則不植有玉版泉在山上味甘冽不
竭相傳昔人斲井得玉版叩之清越如磬聲然 碑目

云唐永泰二年石刻在巴嶽山之化度院石刻但云永泰二年按永泰齊明帝唐代宗年號齊永泰止五月而唐永泰二年十一月始改大歷故知為唐無疑 周茂叔天池詩云清和天氣年能幾短葛輕紗近水涯風似相知偏到袖魚如通信不驚槎笑凭山色傾新甕醉傍汀陰數落花嘯傲不妨明月上 一行歸路起栖鴉又有觀巴嶽木蓮詩云仙姿元是華巔裁不向東林沼上開嫩蕊曉隨梅雨放清香時傍竹風來枝懸縞帶垂金彈

辦落蒼苔墜玉杯若使耶溪少年見定拋蘭槳到品隈
是時漁溪判合州事來遊二作亦皆輕逸不沾道學氣
可喜也 志云治西百步有望仙樓為唐刺史趙延之
建延之刺合州破賊有功後得道仙去詳神仙記中按
少陵巴山詩云巴山過中使云自峽城來盜賊遂奔突
乘輿恐未迴天寒召伯樹地闊望仙臺狼狽風塵裏羣
臣安在哉又有亡名氏詩云西山頂上最高樓登眺能
消萬古愁奉使客來纔十日登仙人去已千秋荒涼巖

卷十八
檜含風雨曲折巴川學字流傍晚蹇驢林下過谿雲潭影兩悠悠皆為延之作也

定遠縣

縣南江邊有新明寺古斷碑云此晉之新明縣也嘉陵玉溪在其左右中有一岩據大江以西秀拔自雄此即西崑境而漢初縣設焉碑目云唐趙應龍塚在舊漢初縣上有一坊左右畫彩鳳大書雍侯之居開元乙卯季秋十九日立又云大圓山有光塵子墨迹云三山相

接欲飛騰高下來為半日登合向中間着夫子大員道士小員僧傍書宋乾道士辰年相傳以為呂仙作矣

安居縣

陳子昂詩序入峭峽安居谿伐木谿源幽邃林嶺相映有奇致焉其詩曰肅徒歌伐木驚櫟漾輕舟靡逆隨迴水潺湲沂淺流烟沙分兩岸露島夾雙洲古樹連雲密交峰入浪浮巖潭相映媚谿谷屢環周路迥光逾逼山深興轉幽麋鼯寒思晚猿鳥暮聲秋誓息蘭臺策將從

桂樹遊因書謝親愛千歲覓蓬丘此即舊縣之安居壩也今縣別名瓊江以官濺溪平灘一帶流入涪江舊傳有瓊花浮水面而出故號為瓊江矣縣理在波羅川東里許蓋有波崙寺云屑峰峭壁聳插雲霄凭欄而望江山如繡每月白前後皎然冰輪若自頂出而殿閣翬飛悠悠松檜間也三仙石連理樹俱在其趾濟勝者所必由矣又東去為鳳凰山昔人于此得遺碑云朝棲梧桐暮宿此山其山頂巨石平正謂之鳳凰臺而西南對

立者曰龍歸山上有龍歸寺山形盤旋如龍亦一方之
幽勝也正南則龍門山兩峰壁立如門漢隱士蘇汝礪
藏書三萬卷于此此初學記所載舊屬銅梁今割入當
縣碑目云龍門山東八里有印土院院有將軍祠石刻
云故唐將也逃難山中而死葬山陰或曰戰國時人也
歲春夏民以車蓋迎其神至水上張帷致饗矣 志云
縣太平里有唐柳玼墓玼在景福間刺渝州遷瀘州道
卒葬於安居也玼公綽之後善書初任御史大夫在渝

時東川節度使顧彥暉請書德政碑玘曰若以潤筆為贈即不敢從命矣其剛正如此

綦江縣

江發源夜郎作蒼帛色故名綦昔南平軍之長官司也志云治南三舍溪關上有雁塔碑曰北地南平軍舊址南平王墓亦在此關瀛山在縣境去郡百二十里有四十八面壁立高峻四時青翠望若蓬瀛唐貞觀置瀛山縣於此宋劉望之詩山盤四十八面險雲暗三百六

旬秋其上有白雲觀觀前石筍參天有碑名鳥道碑
方輿勝覽云南平軍西北有東溪溪上小市有孝感橋
紹興甲戌有里婦從姑過溪姑墜水赴救之亦墜漂至
灘下皆不溺

南川縣

陳復亨廳事記云南平州邊夜郎外控諸酋跨漢二郡
唐五州之境 案宇記曰武德二年置南州理隆陽縣
取西永隆山為名先天避諱改為南川貞觀四年置南

平州理南平縣八年改為霸州又云貞觀十一年涪州置隆化縣亦取永隆山先天改為賓化縣按三地相去密邇俱在渝州南境及涪陵枳縣之舊墟矣通志謂宋初於當縣置南平軍熙寧省入隆化尋復置元併南平軍及隆化入焉者也文苑英華李嶠有勅奉議郎行涪州隆化縣元素履制綰符兩穴游刃三巴賓僚戀仰蠻漢謳吟者矣 寰宇記云南平西四里有赤水即丹水也唐置丹溪縣于此丹溪合於𪔐溪故改南州為𪔐州

馬夔水流入江津縣南界所謂夔溪口也今縣西二里有夔水寺 方輿勝覽云夔溪東溪葛溪合流當縣西北故貞觀又置三溪縣焉其所理名為石城在今縣東甚峻險 偽蜀毛文錫茶譜云南平縣有狼狽山出茶黃黑色渝人重之寰宇記云狼狽鄉人構屋高樹上謂之閣欄不解絲竹惟擊銅鼓祭鬼以祈福一名獠厓在南平軍西 方輿勝覽熊本平木斗夷得地五百里山高谷深乃奏建南平軍謂即板楯七蠻故地先是劉孝

標守南州請置郡縣遠人安之晏殊為孝標撰墓銘尚
在 劉夷叔雲山堂詩山繞郡樓初過雨月臨池樹晚
生烟蒲公孟南川驛詩鶯花非漢舊棟宇尚唐餘趙彥
邁歲熟詩最爾曾無一掌平由來作郡亦強名雲連萬
嶂山橫翠川合三溪水繞城又云風俗連巴楚封疆接
播漆方輿勝覽縣去漆溪三十里為鹿洞堡去播州三
百里為白錦堡 王象之碑目云漆溪寨路西心坎厓
上有隸書本初三年三月十六日共二十餘字文多殘

缺不可讀漢質帝時刻也去南平軍七十餘里又云漆
州堡吹角壩上有古磨厓風雨脫剥苔蘚侵蝕惟識其
一二曰建安其他不可辨漢獻帝時刻也又云吹角壩
有姜維碑始土人開山得一穴穴內有碑姜維字猶可
辨又云南川鎮下三里厓上有石佛像近有碑出於其
下司法叅軍員外郎置司正靳豫撰序云南州城門前
右岸盧舍那石像乃開元十八年十二月丙戌中大夫
使持節南州諸軍事守南州刺史上柱國晉昌唐虞景

所造又云白鵲寺鐘碑字磨滅垂盡尚餘一二可識曰
白鵲寺鐘處士彭城劉欣文也又云羅圍城上有古碑
名平真碑未詳按志治境上有此城

長壽縣

華陽國志江州郡樂城縣在州西三百里延熙十七年
省按今縣界有樂磧鎮即其地寰宇記曰唐武德置樂
溫縣秦時枳地也桓元子別置枳縣在巴之北涪之南
至後周省入于巴縣焉 樂溫志曰樂溫山下有樂溫

灘在縣南四十里元時置涪陵巡檢司因唐縣址也地
氣常溫禾稼早熟因之得名志以此山人多耆耆亦名
長壽山 圖經云昔徐神翁煉丹於枳有丹厓高二十
餘丈下垂瀑布注于江厓下老榕蒼翳弘敞而陰森者
清陰洞也洞中多留題剝蝕不可辨有數行道指稍似
涪翁及元許衡偕門人趙進真來遊題名志云在學宮
右側圖經集仙山為徐神翁飛昇處在縣之北真觀搗
藥杵臼尚存有臺曰烟霞臺即此 志又云白虎山亦

名鳳山在涪西一里山麓刻讀書處三字旁識云端平
二年竊山赴樂溫為史子書按眉人史大用讀書于樂
溫白虎山作崇德廟碑者也鳳山下有韓村宋開禧中
土人韓申之見山坡有綠衣端坐指麾其僕入村酤酒
有白驪齧草其旁即文昌書所謂牧驪化矣圖經云白
虎山石龕篆風月之臺四字甚古其上石厓桃花水出
焉有洞古邃幽深銀鴨石笋杳然人境即桃花洞也
志云不語灘在縣東一里相傳客航過此皆相戒不言

言則灘加洶湧又云玉溪里在縣西八里宋賢譙定天
發曼淵亞夫所居也譙學于伊川曼學于考亭云興
地碑目古書山去樂溫縣四十里有大厯年石刻云昔
人砌山路見石穴中藏蝌蚪書數軸古書之名起于此
宋安剛中張桓侯廟記云漢自建安以來皇綱齊弛
神鼎震覆姦雄觀釁實生豕心本初孟德之徒磨牙礪
吻血視生靈期於吞噬不留遺臭先主忼慨為國志在
援拯一時豪英狗義蜂起相與提挈共成大事諸葛關

張實為之最凜冽威風萬夫之雄荊州之役羣盜鼎來
公為後拒畢力盡死以抗羣醜奮髯張目橫戈一叱蛇
豕異類褫魄逃遯虞淵之日復耀西南繫公之功迄今
千歲英靈之氣森聳如在廟食百世在禮固宜樂溫之
山下瞰大江公之神爽實茲寓焉自古迄今長載祀典升
行上下與彼士民奔走奉事敢不虔至九穀嘉生連被
原隰舸楫往返安流無恙陰相之功在國與民天朝累
封進爵為王惟是廟宇興建歲久行廊爛頽往來咨嗟

力莫能振郡守李公向者趨朝祇謁祠下再拜祈禱厥
應如響至郡未幾首議修繕自捐金帛衆趨成之功費
雖多了不病民撤去卑陋增飾輪奐開展地基比舊加
倍是役也議興於庚午之冬落成於辛未之春焉

蜀中廣記卷十八

欽定四庫全書

蜀中廣記卷十九

明 曹學佺 撰

名勝記第十九

上川東道

重慶府三

涪州

華陽國志巴子時雖都江州先王陵墓多在枳又云涪

陵郡巴之南鄙從枳南入折丹涪水與楚商於地接司
馬錯昔取商於繇此道也漢時恒有都尉守之蜀延熙
中車騎鄧芝以江州都督治陽關于此陽關者巴子所
置三關之一 水經江水東至枳縣西延江水從牂柯
郡北流西屈注之又云江水至巴郡涪陵縣注更始水
鄺註曰水東逕陽關巴子梁江之兩岸猶有梁處寰宇
記云岑彭破公孫述將侯丹於黃石黃石者橫石灘也
謂之石梁 水經註曰江水東至梨鄉歷雞鳴峽江之

兩岸有枳縣治故華陽國志謂枳縣治涪陵水會庾仲
雍謂有別江出武陵者也又曰更始水即延江枝分之
始也延水北入涪陵水王莽更名巴亭張堪為縣會公
孫述來擊于時同心義士選習水者筏渡堪於小別江
即此水也其水北至枳縣入江方輿勝覽云涪江者
自思州之上費溪發源經五十八節名灘方至黔州溉
自黔州溉與施州江會流九十里經彭水武隆二縣凡
五百餘里與蜀江會于州之東以其出於黔州又呼黔

江亦名內江其水淵澄清澈可鑒毛髮底見苔石魚鰕
可數 張祐送李長史歸涪州詩涪江江上客歲晚却
還鄉暮過高唐雨秋經巫峽霜急灘船失次疊嶂樹無
行好為題新什知君思不常戴叔倫漸至涪州先寄王
員外使君縱詩文教通夷俗均輸問火田江分巴字水
樹入夜郎烟毒瘴含秋氣陰崖蔽曙天路難空計日身
老不由年將命寧知遠歸心詎可傳星郎復何意出守
五溪邊陸游詩古壘西偏曉繫舟倚闌搔首思悠悠欲

營丹竈竟無地不見荔枝空遠遊官道近江多亂石人
家避水半危樓使君不用勤留客瘴雨蠻煙我欲愁

方輿云黔江東岸有龜山州治其上元和志舊州在岷
江南今州在涪江西蜀漢涪陵太守龐肱有惠政輿地
碑目淳熙中左綿任子宣過涪陵於民家見漢隸石闕
上書漢涪陵太守龐肱闕闕製如碑 東渡高峯之上
與州治相對為石甕磧方輿勝覽云太守吳侯嘗遊石
甕磧遇一女織葢步磧上曰吾父居此瀕去解一玉環

付庠吏為我謝使君異日當歷顯任子孫復守此州言訖不見按志吳光輔為涪守後三十年其孫仲復又守是邦今吳公溪吳公山所為得名也 舊經云吳君山

一名鐵櫃山橫亘江北與涪陵縣相望雄壓衆山俯臨長江屹立如櫃相傳武侯屯兵于此舊城猶存 勝覽

云鐵櫃之南為北岩王真人修煉處也紹聖丁丑程伊川謫涪即普淨院闢堂傳易再閱歲為元符庚辰乃徙夷陵 碑目云涪陵江北普淨院記治平間校書郎傅

者撰北岩書院記嘉定丁丑簡池劉光祖撰普淨院鉤
深堂榜別駕黃庭堅書又有淳祐辛丑三月既望古綿
劉濟川三山林元成都杜庭燮三瀘何清題名又有汴
陽吳克舒以紹興癸未書雲日舉家來遊阱掾侍行諸
刻輿地紀勝云開寶四年黔南上言江心石魚見上
有古記云廣德元年二月大江水退石魚見部民相傳
豐稔之兆按其處在近州鑑湖中央石上刻雙魚一銜
蓂草一銜蓮花各三十六鱗傍有石秤石斗或十年或

三五年一出唐大順元年鐫詩甚多 方輿勝覽州西
一里白鶴灘爾朱真人沖舉之處志云爾朱既浮江而
下漁人有白石者舉網得之擊磬方醒遂於涪西灘前
修煉後乘白鶴仙去因以名灘 又云爾朱先生種松
山在州東二里種時松影映石石皆有松紋至今呼松
屏石採者禱於先生乃得佳不煩人力自然成文 華
陽國志延熙二年馬忠定越雋置赤甲軍常取涪陵之
民蜀丞相諸葛亮亦發勁卒三千人為連弩士按志有

赤甲戌與黃草峽相近在李渡之上蘭市之下杜甫詩
云黃草峽西船不歸赤甲山下行人稀即此地也 碑

目云許雄山有古廣漢縣令神道碑俗呼為誓虎碑偶
碑仆遂有虎入城縣官設祭復豎碑虎害乃止按山在
州西南七里山之東有馬援壩 志云馬援壩在治南
四里伏波祠在治東十里相傳將軍征武陵蠻駐兵之
處寰宇記涪陵江中有銅柱灘最峻急昔人維舟于此
見水底有銅柱云 灘之東為錦繡洲九域志云此洲

人業織錦罽也宋翰詩錦繡洲猶在熊羆夢已無文風
齊兩蜀仙洞接三都白石從天設青崖見地圖荔枝妃
子國不復曩時輸方輿勝覽云域西十五里有妃子
園其地多荔枝昔楊妃所嗜當時以馬遞馳載七日七
夜至京人馬多斃於路百姓苦之故杜牧之過華清宮
詩云長安迴望繡成堆山頂千門次第開一騎紅塵妃
子笑無人知是荔枝來華陽國志涪陵郡有丹興縣
以山出名丹也蜀時省李特傳范長生一名延久又名

九重涪陵丹興人按史記巴寡婦清之先得丹穴而擅其利家富不貲清能守其業用財自衛秦皇帝以為貞婦而為築女清臺括地志云女清臺山在永安城東北七十里為涪陵南平二郡界

武隆縣

漢涪陵枳二縣地唐武德元年分涪陵縣立以邑界武隆山為名本志云枳縣故址在治東上流二十里李膺益州記云內江水自萬寧西北二百八十里至關頭灘

灘長百步懸崖倒水舟楫莫通寰宇記云內江一名涪陵江一名巴江在縣南屈曲北流又云蜀江門灘在縣前巴江水中 志云縣西一里古渡頭有斷石中白痕如劍光芒燭天名為天劍又云南二十里有信水在峽口其泉如沸水與江等日有三潮每至則高尺餘又云龍寶潭在縣東北七十里古箐淒其人鳥兩絕杖藤而入幽徑可十里忽平沙廣野曲壑清泉別一世界 四夷攷云武隆之地東隣黔楚西接牂柯北枕巴江南通

貴竹又三面界土司為酉陽之咽喉石砭之頂臂至若
真州則撲胸之患矣所謂難先全蜀險阨諸蠻者也

彭水縣

史記秦司馬錯取楚商於之地為黔中都即此寰宇記
云即劉璋之漢葭縣矣隋開皇十三年蠻帥內屬故于
此地設彭水屬黔州亦州之所理也本志云舊理在壺
頭山之麓今移於紹慶府基按宋史太平興國八年黔
州摩圍山慶雲出通判黃仲震圖頌以獻中興小厯理

宗始追封為紹慶府焉 權載之黔州觀察使廳記云
黔中為楚西南徼道在漢為武陵莊蹻循江以畧地唐
蒙浮船以制越舊經地近荆楚侯如巴蜀五溪襟束蠻
蜚聚落陰雨多晦草木少凋寰宇記云五溪謂酉辰巫
武沅等五溪古老相傳楚子城巴巴子兄弟五人流入
五溪各為一溪之長一說五溪蠻皆盤瓠子孫自為統
長故有五溪之號古謂之蠻蜚聚落也三國志劉先主
于五溪蠻之地置黔安郡即此地樂史以為郡後周設

誤矣 劉長卿送任侍郎黔中克判官詩不識黔中路
今看遣使臣猿隨萬里客鳥似五溪人地遠官無法山
深俗易淳湏令荒徼外亦解懼埋輪司空曙送龐判官
赴黔中詩云天遠風雲異西南見一方亂山來蜀道諸
水出辰陽堆紫青油暮看暮畫角長諭文誰可製記室
有何郎李嘉祐送上官侍御赴黔中詩莫向黔中路令
人到欲迷水聲巫峽裏山色夜郎西樹隔朝雲合猿窺
曉日啼南方饒翠羽知爾飲清溪許棠寄黔南李校書

詩從戎巫峽外吟興更應多郡響蠻江漲山昏蜀雨過
公筵饒越味俗土尚巴歌中夜懷吳夢知經灩澦波顧
非熊送皇甫司錄赴黔南幕詩黔南從事客祿利向來
饒官受外臺屈家移一舸遙夜猿聲不斷寒木葉微凋
遠別因多感新郎倍寂寥杜荀鶴送人尉黔中詩盤山
行幾驛水路復通巴峽漲三川雪園開四季花公庭飛
白鳥官俸請丹砂知尉黔中後高吟采物華許琳黔中
書事詩巴蜀水南偏山窮塞壘寬歲時將近臘草樹未

知寒獨狖啼朝雨羣牛向暮灘更聞蠻俗近烽火不艱
難竇羣黔中書懷詩萬事非京國千山擁麗譙佩刀看
日曬賜馬傍江調言語多重譯壺觴每獨謠沿流如着
翅不敢問歸橈李頻黔中酬同院韋判官詩平生同所
為相遇偶然遲各着青袍後無歸白社期江流來絕域
府地管諸夷聖代都無事從公且賦詩 碑目云漢故
孝廉柳莊敏碑在州解內字迹銷謫唐黔南節度使趙
國珍德政碑上元二年立在州南隔江崔能神道碑集

古錄以為長慶二年立在州治山谷刀筆云宋左藏庫副使東南第八將秦世章自長沙買石摹僧寶月古法帖十卷載回黔安壁之紹聖院庭堅為之跋按世章秦子明涪州人也丹鉛錄謂寶月帖又在隋開皇帖南唐昇元帖之前比之金薄匱紙銀錠櫟痕者優劣當懸矣紀勝云魯直謫居有涪翁晚策杖至此觀江漲雨餘天欲涼十五字墨蹟在州之嘉禾堂又黔中與人帖云庭堅頓首竊觀鎮靜足以安夷獠清節足以服吏民郡

閣宴閒時與僚佐歌舞以謝江山當亦無不樂時別後
未嘗不思英對也齋中小宴歌舞中更得新進否此邦
樂籍似皆勝渝瀘微有成都之風也 本志載宋冉木
震黔州倅衙月山岩銘云黔號古郡地居極邊倅治倚
山其山刺天有曰月巖古老相傳視事累月徧求茫然
偶濬溝渠巨石中填深掘視之厥狀巒岏中竇一穴透
明而圓皎如秋月翳絕雲煙旁補三隙如星之聯技拭
細觀古識存焉善命僕夫挽置座前負以層石映以灣

泉日對其側卷舒簡編凡物遭遇皆有夤緣高岸深谷
知幾變遷惟我月巖存千萬年又飛來峯銘云黔山角
逐雲空相摩疊石其間如戟如戈否則蹲伏橫立攢阿
千狀萬怪知名幾何惟飛來峯涪翁相遭有筆如椽三
字袞袞一經品題聲價倍高譬如人乎何地無材不遇
知音均混草萊有送吹噓清冥路開一飛冲天迥絕塵
埃噫歟茲石千古皚皚四維整植如出剪裁日炙雨澆
蒼然生苔不動惟汝何從飛來因涪翁重汝何能哉

志云綠陰軒在治南一里石軒下平曠可容十數人黃
魯直過此手書綠陰軒三字鑄于石壁至元年紹慶總
管向午鳳重修有臥佛巖與綠陰軒相近巖石欹懸生
一竅甚圓仰窺之又生一竅其中虛明有橫石一塊眉
目宛然如來佛曲肱枕臥時也 紀勝云西南過江五
里有摩圍山夷獠呼天為圍以其高摩于天也道家謂
之洞天福地昔有樵者攀緣入洞見二老圍碁其中回
復尋之了不可得魯直安置黔中寓開元寺號摩圍老

人有石泉在山頂山勢壁立泉從石竇中流出寺僧以甕接之為朝夕清供碑目載摩圍山唐人石刻云巴黔路途濶遠亦無館舍凡至宿泊多倚溪品就水造飡鑽水出火山谷集云丙子仲秋黔守席上客有舉杜少陵中秋詩曰今夜鄜州月閨中只獨看遙憐小兒女未解憶長安因戲作詞云舉頭無語家在月明生處住擬上摩圍最上峯頭試望之偏憐鍾秀苦炎同甘誰更有想見牽衣月到愁邊總未知又丙子仲秋奉陪黔陽曹使

君伯達翫月作減字木蘭花兼簡施州張使君仲謀云
中秋多雨常是罇罍狼籍去今夜雲開須道姮娥得得
來不知雲外還有清光同此會笛在層樓聲徹摩圓頂
上頭九州要記云黔州有彭水在信寧縣即古之黔
中地志云唐長孫無忌墓在信寧西岸岐山之麓按史
無忌洛陽人累官太子少傅同中書門下三品高宗時
諫立武后許敬宗誣奏無忌反削其官爵謫黔州安置
沒葬是鄉居人歲以三月三日致祭云

黔江縣

隋之石城縣也志云城東二十五里為舊縣矣又云歌羅驛在治東百九十里黃魯直竹枝歌七首題于驛壁其一云浮雲一百八盤縈落日四十九渡明鬼門關外莫言遠四海一家皆弟兄志云四十八渡水在治西二十里發源柵山溪水折流四十八灣夾于兩岸之間春月百花飄落隨水可愛又云治西五十里峭壁中有木櫃人迹不到曰櫃子厓在四十八渡之中李頻泛黔江

詩野梅將雪競江月與沙寒即此水也

忠州

譙周三巴記曰臨江縣後漢初平六年立在水寧郡東
四百里臨江南古城水經曰江水又東逕臨江縣南
註謂王莽之鹽江縣也郡國志云梁于此立臨江郡隋
置臨州貞觀始改為忠州忠之名以巴蔓子或云嚴顏
按華陽國志周之季世巴國有亂將軍蔓子請師於楚
許以三城楚王救巴巴國既寧楚使請城蔓子曰藉楚

之靈克弭禍難誠許楚王城將吾頭往謝之城不可得也乃自刎以頭授楚使楚王歎曰使吾得臣若巴蔓子用城何為乃以上卿禮葬其頭巴國葬其身亦以上卿禮今治西北一里有蔓子冢 三國志劉璋使嚴顏守巴郡為張飛所擒欲降之顏曰有斬頭將軍無降將軍飛怒命斬之顏從容曰斫頭便斫頭何必怒耶今臨江縣西南二十里有嚴太守碑及詞蘓軾詩云先主反劉璋兵意頗不義孔明古豪傑何以為此事劉璋固庸主

誰為死不二顏子獨何賢談笑傲礪几國亡君已執嗟
子死誰為何人刻山石使我空涕淚蘓轍詩云古碑殘
缺不可讀遠人愛惜未思磨相傳昔者嚴太守刻石千
歲字已謾嚴顏平生吾不記獨憶城破節最高被擒不
辱古亦有吾愛善折張飛豪軍中生死何足怪乘勝使
氣可若何斫頭徐死子無怒我豈畏死如兒曹匹夫受
戮或不避所重壯氣吞黃河臨危閒暇有如此覽碑慷
慨思橫戈自註云碑在忠州本志州西五十里江中高

阜名唐土洲有嚴顏墓碑及祠 九域志云臨江郡有
古屈原碑王象之碑目亦引之東坡謂屈原古塔在忠
忠不當有此意者後人追思為之其詩曰楚人悲屈原
千歲意未歇精魂飄何處父老空哽咽至今滄江上投
飯救饑渴遺風成競渡猿呌楚山裂屈原古壯士就死
意甚烈世俗安得知眷眷不忍決南賓舊屬楚山上有
遺塔陸游詩云我遊南賓春暮時蜀船曾繫掛猿枝雲
迷江岸屈原塔花落空山夏禹祠塔在江之南岸 紹

聖四年王闢之知忠州建四賢閣於治後四賢者故相
司徒鄭州刺史南華劉晏士安故相贈兵部尚書嘉興
陸贄敬輿中書侍郎平章事贈司徒安邑李吉甫宏憲
刑部尚書致仕贈右僕射下邳白居易樂天皆有像設
今移在學宮 輿地碑目云忠州學宮有漢江原君石
闕闕上延熹等二十七字可搨自州西十五里移來者
又有晉王右軍半月橘帖經涪翁題跋 又云州治有
漢建初中修道碑字已漫滅餘建初等十二字可辨治

內議道堂有唐率更柘漿帖碑太守王聖涂購自臨江
農民瞿氏命男宗摹刻紹聖四年七月二十四日後有
山谷題跋 又云州儀門下有漢延熹嚴孝子碑按華
陽國志元初中貢孝子嚴永即此碑矣字已漫蝕餘延
熹二年等八十餘字自城西二十里移來者 文苑英
華唐蘇頌有授忠州刺史上騎都尉王守廉制陳子昂
有忠州江亭喜遇吳叅軍見牛司倉序畧云江亭迴瞰
羅雜樹于階基山榭遙臨列羣峯于戶牖丹藤綠篠俯

映長筵翠渚洪瀾交流合坐者矣杜甫宴忠州使君姪
宅詩出守吾家姪殊方此日歡自須遊阮舍不是怕胡
灘樂取長歌送杯饒旅思寬昔曾如意舞牽牽強為看
李端送濮陽錄事赴忠州詩成名不逐雙旌遠空印還
為一郡雄赤葉黃花隨野岸青山白水映江楓巴人夜
語孤舟裏越鳥春啼萬壑中間說古書多未校肯令才
子久西東白居易郡中春讌因贈諸客詩僕本儒家子
待詔金馬門塵忝親近地孤負聖明恩一旦奉優詔萬

里牧遠人可憐島夷帥自稱為使君身騎牂柯馬口食
巴江鱗暗淡緋衫故爛斑白髮新是時歲一月玉厯布
春分頒條足皇澤命宴及良辰冉冉趨府吏蚩蚩聚州
民有如蟄蟲鳥亦應天地春薰草席鋪座藤枝酒注樽
中庭無平地高下隨所陳蠻鼓聲坎坎巴女舞蹲蹲使
君居上頭掩口語衆賓勿笑風俗陋勿欺官府貧蜂巢
與蟻穴隨分有君臣 樂天刺史茲邦風流暇豫日事
遊賞其踪跡最著者有東樓荔枝樓鳴玉溪龍昌寺巴

子臺東坡東澗諸勝黃魯直為王聖涂作記云樂天東樓以燕賓佐西樓以瞰鳴玉溪登龍昌上寺以望江南諸山張樂巴子臺以會竹枝歌女東坡種花東澗種柳皆相傳識其舊處焉東樓即城東樓也白公東樓詩云山東邑居窄峽牽氣候偏林巒少平地霧雨多陰天隱隱煮鹽火漠漠燒畬煙賴此東樓夕風月時翛然憑軒望所思目斷心悁悁又東樓竹詩云瀟瀟城東樓遶之多修竹森然一萬竿白粉封青玉捲簾睡初覺欹枕

看未足影轉色入樓牀席生浮綠空城絕賓客向夕彌
幽獨樓上夜不歸此君留我宿荔枝樓在治西南隅
即西樓也公既作荔枝圖以寄親友又建樓以賞之其
詩曰鄉路音信斷山城日月遲欲知州近遠階前摘荔
枝又西樓詩云悄悄復悄悄城隅隱林杪山郭燈火稀
峽天星漢渺年光東流水生計南枝鳥月沒江沈沈西
樓殊未曉寰宇記云鳴玉溪在州西十里上有懸岩
瀑布高五十餘丈潭洞幽邃古木蒼然前刺史房式嘉

其幽絕特置蘭若凡有五橋以渡長慶集云鳴玉溪上
木蓮穠茂元和十四年夏命道士母邱元志寫之本志
云溪在治西二里發源西厓水聲如珮玉其傍有古刻
亦名西溪又云西北五里有木蓮洞宋錢求之詩云鳴
玉溪邊堪寓目木蓮洞下更闢情忠州好景無人說祇
得孤城小市名今治內有木蓮樓相沿其名非故處也
龍昌有上寺下寺俱唐建在西山頂者為上寺即巴
臺寺也與翠屏山相對故云可以望江南志謂之巴子

臺巴子所築也唐宋詩刻存焉下寺即治平寺寰宇記
曰龍昌寺在臨江縣東今為治平寺白公嘗於寺旁植
柳柳盛則寺興柳衰則寺廢寺僧愛此柳比之甘棠

白傅登城東古臺詩迢迢東郊上有土青崔嵬不知何
代物疑是巴王臺巴歌久無聲巴宮沒黃埃志云巴王
廟在州東一里神即蔓子將軍也歲三月七日太守以
豕帛致祭先期土人具千鈞蠟祠之宋為永順祠今為
忠貞祠 王象之碑目云漢丁房雙石闕在巴王廟前

按左闕高可二丈覆以飛甍層觀最上琢雙扉一美人
現半身倚立中層琢車馬人物旁刻文螭糾蟠長可三
四尺金石古文云此漢畫之始也正面漢隸十行行三
十字強半剥落惟漢都尉丁房五字相聯可讀它無恙
者尚三二十字闕陰鐫云紹聖丁丑五月戊午知忠州
軍州事齊國王闕之軍事推官荆南李鑑兵馬監押雒
陽田缺巡檢安化楊中孝監稅濟南蓋儀逸錄事高陽
張復臨江縣令竟陵張微司戶叅軍楊安文同司理叅

軍雲安常彥臨江縣主簿東武缺同遊永順王祠坐東
軒面巴峽臨岷江望東溪之龍潭崇山峻嶺激湍清流
真山陰之蘭亭也於是賦詩酌酒極一時適將歸共觀
石闕之上讀漢都尉丁房碑欲重加刊刻而文字磨滅
竟不可辨相與嘆息而去右邊闕就圯近日為有司者
新之了非故物 巴臺下江中有石圓光如鏡旁有五
石筍簇之呼為仙人照鏡臺 勝覽云東坡在南賓郡
圃有亭名東亭白公詩綠樹為閒客紅蕉當美人又何

處慇懃重回首東坡桃李種新成又最憶東坡紅爛熳
野桃山杏水林檎蘇子瞻東坡之號實始於此其詩云
平生自覺出處老大粗似樂天非東坡之名偶爾同也

志云東澗在治西開元寺側亦樂天時鑿公有東澗
種柳詩云野性愛栽植柳水中坻三年未離郡可以
見依依 水經曰江水又逕虎鬚灘灘水廣大夏斷行
旅今州西二里有石梁三十餘丈橫截江中俗呼倒鬚
灘即其處 輿地碑目塘土洲有貞元十七年段文昌

撰耆老思舊碑有唐刺史房公式善狀碑志云塘土洲
在治西五十里有景德寺善狀碑立在普寧院中 水
經曰江水又東得黃華水口左逕石城南志云即皇華
洲在東五十里江浦週迴可二十里碑目云有宋忠州
貢院碑叅軍安元白立金魚堡碑陞忠州為咸淳府碑
俱在此洲上咸淳碑詔文勅門下皇天畀付有家敢怠
繼承之敬乾元首出庶物聿懷潛躍之初念聖考之貽
謀擇价藩而錫履嚴陵龍水之鎮受節齋垓永嘉忠南

之封分茅主社瞻言屏翰之重允協謳歌之歸漢興地
之上圖若規先憲周舊邦之新命並錫府名以壯萬年
之觀亦尚一人之慶其改陞溫州為瑞安府嚴州為建
德府宣州為慶遠府忠州為咸淳府咸淳元年八月二
十九日午時急速按察宇記石城在臨江縣東百里岷
江之北岸李雄之亂巴西郡寄理于此城四面懸絕亦
謂之巴子城矣 華陽記曰臨江縣有鹽官在監涂二
溪一郡所仰按涂溪在州東八十里發源蟠龍洞來經

涂井井神為漢楊伯起井廟碑云神嘗刺史荊州邈江
至此憩于南城寺謂人曰江北二三里間安得有寶氣
耶至蟠龍洞見周柱下史丹爐曰此地有龍無虎宜其
丹不就也至涂山見白鹿飲泉曰寶氣在此矣土人從
所指處鑿磐石而得鹽泉廟在治東一里志云東南八
十里方斗山以形名也山有龍洞其神號方斗龍王所
謂涂山與蟠龍洞者此是又云東二十里香爐堆北有
石碑云處士楊佐墓漢楊伯起之裔孫 南山即翠屏

也在對岸二里山中有禹廟陸宣公墓玉虛觀朝真洞
望夫臺仙履迹諸勝白傳作樓以望之其詩云江上新
樓名四望東西南北水茫茫又有望南山寄行簡詩臨
江一嶂白雲間紅綠層層錦繡斑不作巴南天外意何
如昭應望驪山輿地碑目禹廟有唐碑字畫漫滅不
可讀宋碑乃張俞作杜甫詩云禹廟空山裏秋風落日
斜荒庭垂橘柚古屋畫龍蛇雲氣噓青壁江聲走白沙
早知乘四載疏鑿控三巴度禹廟緣山行可里許為玉

虛觀輿地碑目云玉虛觀有唐人修建碑四方輿勝覽云玉虛觀南三十步有陸宣公墓舊經陸宣公贄藁葬于此或曰宣公已歸葬攜李忠南特虛塚耳然子美已歸葬偃師而未陽之墓自若太白已移殯青山而采石之塚猶在則敬輿此基宜封植之矣玉虛亦名紫極觀通志云忠州南十里有望夫臺未詳其事按東坡忠州望夫臺詩云山頭孤石遠亭亭江轉船回似石屏可憐千古長如昨船去船來自不停浩浩長江赴滄海紛

紛過客似浮萍誰能坐待山月出照見寒影高伶俜

本志仙履跡石在治北八十里相傳昔有真人立此飛
昇今足跡尚存宋秦東詩仙人雙赤腳踏石如踏泥泥
痕尚可沒石痕不可迷 杜甫嘗居龍興寺有題院壁

詩云忠州三峽內井邑聚雲根小市常爭米孤城早閉
門空看過客汨莫覓主人恩淹泊仍愁虎深居賴獨園
陸游龍興寺弔少陵寓居詩中原草草失承平戍火胡
塵到兩京扈蹕老臣身萬里天寒來此聽江聲註云寺

門外江聲甚壯在州北八十里又二十里有拔山寺與
龍興寺俱漢永平間建宋馮時行寶華寺詩雨宿初收
草木濃羣鴉飛去法堂空長廊無事僧歸晚盡日門前
只看松即漢之普明寺也已上三寺志云在州北九十
里 志云東北三十里大成寺漢初平建西北四十里
寶珠寺晉永和建西北百里雙龍寺唐貞元建張詠雙
龍寺詩未踏陽關已見山木鯨時吼翠微間老僧隨隊
看雲起居士忘緣共鶴閒入眼煙光依砌濕倚空霧氣

遶山環三朝寶訓神明護大讀經章祝玉顏

鄧都縣

水經曰江水又逕東望峽東歷平都註謂峽對豐民洲
舊巴子別都也華陽國志巴子雖都江州或治平都即
此續漢書永元二年分枳置平都取界內平都山為名
方輿勝覽云自鄧都縣東行二里許始登山石徑縈
迴可一二里平瑩如掃林木邃茂夾逕翠栢黃葛殆萬
株有數十株是千年物此即平都山也 酈道元曰平

都有天師治兼建佛寺甚清靈道書號為平都福地輿地紀勝云仙都觀在平都山唐建宋改景德又名白鶴觀有陰長生詩天成四年書也通攷云陰真人祠刻詩三章乃貞元中刺史李貽孫書元豐四年轉運判官許安世過祠下閱石定為陰仙之作乃屬知夔州吳師孟書石送置觀中詩見神仙記百川學海云治平末蘇東坡泝峽泊舟仙都山下道士持陰長生石本金丹訣就質真贗東坡荅曰不知也然士大夫過此必以請久

久自有知之者按古今詩謠云蜀道觀中泚井得一碑
其文曰有物有物可大可久採乎蠶食之前用乎火化
之後成湯自上而臨下夸父虛中而見受氣應朝光功
參夜漏白英聚而雪慚黃酥凝而金醜轉制不已神趨
鬼驟金歟玉歟天年上壽無著於文訣之在口此即陰
仙所著丹訣也 勝覽云陰長生以延光元年於平都
山白日昇天山頂五雲洞中嘗有雲氣從丹井中出洞
有五雲樓壁上瑤池樂部四字段文昌書 輿地碑目

云仙都觀有二仙公碑李虔撰二仙銘薛湜撰俱景雲
二年立陰真人影堂碑王真人碑俱李吉甫撰貞元
立其石瑩潤而白號為玉石碑又有商比干銅盤銘開
元間掘自偃師縣翻刻于此文曰右林左泉後岡前道
萬世之銘茲焉是寶又有中和元年忠州刺史陳旉三
官碑丞相段文昌修觀碑段少監修齋記天尊石像記
老君石像記張大理詩杜光庭石函記按今皆不存
志云總真羣仙之府道山洞天等刻或隸篆或真行大

徑尺呂純陽書見存純陽登平都有訪仙詩云孟蘭清
曉過平都天下名山總不如兩口單行誰解識王陰空
使馬蹄虛又云一鳴白鳥出青城再謁王陰二友人口
口惟言三島樂擡眸已過洞庭春宋蘇軾詩足躡平都
古洞天此身不覺到雲間擡眸四顧乾坤濶日月星辰
任我攀又平都天下古名山自信山中歲月閒午夢任
隨鳩喚覺早朝又聽鹿催班蘇轍詩山前江水流浩浩
山上蒼蒼松栢老舟中去客日紛紛古今換易如秋草

空山樓觀何崢嶸真人王遠陰長生飛符御氣朝百靈
悟道不復誦黃庭龍車虎駕下來迎去如旋風轉太清
真人厭世不回顧世間生死如朝暮學仙度世豈無人
殮霞絕粒常辛苦安得獨從逍遙君冷然乘風駕浮雲
超世無有我獨行范成大詩云神仙得者王方平誰其
繼之陰長生飄然空飛五雲輶上賓寥陽留玉京石爐
丹氣常夜明寵光萬栢森千齡峽山偈仄岷江縈洞宮
福地古所銘云有北陰神帝庭太陰黑簿囚鬼靈自從

仙都啟巖扃高霞流電飛伏精暉景下墮爍九氷寒絕
苦道升無形至今臺殿棲岑嶺隋圻唐堊留丹青十仙
怪寄溪如清瑤池仙仗紛娉婷琅璈赴節鏘欲鳴我來
秋暑如炊蒸汙流吁氣扶枯藤摩挲衆蹟不暇評聊記
梗槩知吾曾 段文昌修平都觀記云平都山最高頂
即漢時王陰二真人蟬蛻之所也峭壁千仞下臨湍波
老栢萬株上挿峯嶺靈花綵羽皆非圖志中所載者昏
旦萬狀信非人境貞元十五年余西遊岷蜀停舟江岸

振衣虔潔詣諸洞所石品靈竇蒼然相次苔龕古書依稀可辨時與道侶數人坐於下須臾天籟不起萬竅風息山光耀於耳目煙霞拂於襟袖相顧神竦若在紫府玄圃矣牽於行役不得淹久瞻眺惆悵書名而去邇來已三十四年太和庚戌歲自淮南移鎮荆門有客由峽中來者皆言當時題記文字猶在觀宇歲久臺殿荒毀不三數年必盡摧沒於巖壑矣乃捨一月秩俸俾令修葺子來同力浹旬報就去年冬十一月詔命換麾幢再

領全蜀沂三峽歷舊遊依然景物重喜登覽聞泉聲而
緩步愛松色而難別遂命筆硯志於巖谷時太和七年
正月五日 道經云老子騎青牛度函谷將息駕于平
都今縣二里有青牛山在平都之左 方輿勝覽云景
德觀前鹿麕時出沒林間與人狎志云自平都西去一
里林樹叢密者白鹿山也霏雪錄云蘇老泉將遊仙都
觀知縣李長官云故知君之將至也問何以知之曰此
山巨鹿鳴輒有客至屢驗輒未一失老泉亦嘗為人言

之東坡白鹿山詩云日月何促促塵世苦拘束仙子去
無跡故山遺白鹿仙人已去鹿無家孤悽悵望曾城霞
至今聞有遊仙客夜來江浦畔平沙長松千樹聲蕭瑟
仙客去人無咫尺夜鳴白鹿安在哉滿山秋草無踪跡
山之翠微有玉鳴泉響作琴音清澄玉色其麓有流杯
溪溪凡七出相傳平都之仙常燕集于此 華陽國志
巴子又立市於龜亭北岸今新市里是也註水經曰平
都縣有市肆四日一會東坡詩我生飄蕩去何求再過龜

城歲五周身行萬里半天下僧臥一菴初白頭題云過
石龜山作也舊志石龜山在縣東五十里其下有村墟
志云縣在豐民洲登平都山望岷江西來繞之而去
其支流派別名為溪者可得而數焉稂溪在治東山上
有魏國夫人墓未詳年代葫蘆溪在西南邃窈莫測蛟
龍是宅青螺綠髻上下相映志謂之月鏡潭也碑溪以
古碑名不知何代物去縣稍遠望途溪在古南賓縣地
今為南賓里舊屬忠州鄰石碣司 志又云龍渠縣今

名縣壩屬散毛宣撫司縣有引藤山出藤大如指可以
吸酒白樂天詩閒拈枯葉題詩句悶折藤枝引酒嘗亦
近南賓界 愚按豐民洲在平都山下隋兩取之以名
縣自豐旁加邑而羅酆地府之說始行今引真誥廣記
二文附此真誥曰羅酆山在北方癸地註此癸地未必
以六合言當是於中國指向正在幽州遼東之北北海
之中去岸不知幾千萬里又曰六天宮是鬼神六天之
治也洞中六天宮亦同名相像如一世有知酆都六天


宮門名則百鬼不敢為害陶宏景曰此應是北酆鬼王
決數罪人住處其神即經所稱閻羅王矣太平廣記曰
東都豐都市在長壽寺之東北初築市垣掘得古塚土
藏無塼甃棺木陳朽觸之便散屍上著平上幘朱衣得
銘曰筮道居朝龜言近市五百年間于斯見矣當時達
者叅驗是魏黃初二年所葬也然范成大詩云有北陰
神帝庭太陰黑簿囚鬼靈則酆都之說亦不起于近代

墊江縣

唐通典曰魏恭帝始置忠州墊江縣後周改名魏安隋開皇十八年復為墊江蔡松年南史補曰漢之墊江今之合州也合州置自西魏及隋煬帝改合州為涪陵郡於是移墊江之名于桂溪縣桂溪溪旁多桂樹也縣以樹名寰宇記曰桂溪縣有清水有容水在桂溪南三里清水唐縣名猶開州之清濁二水矣縣又有鹽溪今治北小溪上有古碑乃宋淳熙中物 孟康註地理志曰墊江之墊音重疊之疊晉太康地記曰墊江因李雄之

亂移置于陽關陽關未詳疑即陽關為三關之一碑
目會仙洞榜在治北四十里之鳳凰山李太白書羅王
洞榜在治北五十里之西山李唐勅賜也按西山磐石
上有巨人迹或羅王榜之始名志云東北二十里有
古寺曰秋月禪關唐馬祖修淨之所即峯頂山也又二
十里有古洞飛湍喧阗如雷聲聞十餘里久晴聞之則
雨久雨聞之則晴段氏遊蜀記曰忠州墊江縣以蘇
薰為席絲為經其色深碧渝志云明玉珍僭號以墊

江為雞鵝食邑亦猶巴子以東突硤為畜牧沮矣



蜀中廣記卷十九